

आकाशवाणीखबरां

1. प्रधानमंत्री नरेंद्र मोदी होर कल बडुलै नमीं दिल्ली च पर्यावरण ते जलवायु गतिशीलता पर अंतरराष्ट्री कांफ्रेंस दा उद्घाटन करडन।
2. प्रधानमंत्री मोदी कल 20में रोजगार मेले च 51 ज्हार नियुक्ति पत्र बंडडन।
3. विदेश मंत्री डा. एस. जयशंकर होरें भूटान दे विकास सरबन्धी लक्ष्यें ते प्राथमिकताएं लेई भारत दे सहयोग दी पुष्टि कीती।
4. हिंदोस्तान एयरोनाटिक्स लिमिटेड नै अज्ज बेंगलुरु च रक्ष मंत्री राजनाथ सिंह हुंदी मौजूदगी च भारती ब्हाई सेना गी एल.सी.ए तेज ते एच.टी.टी-40 प्रशिक्षण ज्हाज सौंपे।
5. रेलवे नै महाराष्ट्र च मुकुटवन ते गढ़चंदूर बश्कार नमीं रेल लाइन दे निर्माण लेई 493 करोड़ रुपें दी परियोजना गी मंजूरी दिती।
6. वैश्विक रेटिंग एजेंसी मूडीज़ नै इस माली बरे लेई भारत दी असल सकल घरेलू उत्पाद वृद्धि दर बधाइये 7 प्रतिशत कीती।

<><><><><><>

PM- Env. Conference

प्रधानमंत्री नरेंद्रमोदी होर कल बडुलै नमीं दिल्ली च पर्यावरण ते जलवायु गतिशीलता दा भविष्य विशे पर आयोजित अंतरराष्ट्री सम्मेलन दा उद्घाटन करडन। दो दिनें दे इस सम्मेलन च न्यायिक दृष्टिकोण, वैज्ञानिक ज्ञान ते संस्थागत अनुभवे दे आदान-प्रदान लेई इक मंच उपलब्ध होग। प्रतिभागी प्रमुख पर्यावरण ते जलवायु सरबन्धी चुनौतियें पर चर्चा करडन, जिंदे च नीति निर्माण, कारकदगी च कमियां शामिल न।

<><><><><><>

PM-Rozgar Mela

प्रधानमंत्री नरेंद्र मोदी होरें कल वर्चुअल माध्यम राहें 20में रोजगार मेले च विभिन्न सरकारी मैहकमे ते संगठनें च भर्ती होए दे नौजवानें गी 57 ज्हार शा मते नियुक्ति पत्र सौपडन। इस मौके पर मोदी होर कार्यक्रम च मौजूद लोकें गी संबोधित बी करंगन। एह रोजगार मेला मुख्य भरै दी 45 थाहरें पर आयोजित कीता जाहग। नमें नियुक्त कीते गेदे नौजवान भारत सरकार दे बक्ख-बक्ख मंत्रालयें ते मैहकमें च शामिल होंगन जेहदे च राजस्व, रेल, गृह मंत्रालय, सेहत ते परोआर कल्याण मंत्रालय, वित्तीय सेवा विभाग ते रक्षा मंत्रालय शामिल न। 20में रोजगार मेले कन्नै कुल मलाइयै तकरीबन 12 लक्ख 75 ज्हार युवाएं गी बक्ख-बक्ख मैहकमें ते सरकारी संगठनें च नियुक्ति हासल होई गेदे न।

<><><><><><>

PM-25 Years

प्रधानमंत्री नरेंद्र मोदी जन सेवा थमां देश सेवा दे मंत्र ते लगातार बचनबद्धता कन्नै परिभाषित सार्वजनिक सेवा दे 25 बरे पूरे करा'रदे न। सेवा ते सुशासन दे इस दृष्टिकोण थमां प्रेरित होइयै सरकार 2047 तगर विकसित भारत दे लक्ष्य गी हासिल करने आली भेठा लगातार कम्म करा'रदी ऐ। समावेशी विकास ते समाजी सशक्तिकरण दिएं कोशिशें कन्नै लोकें दा जीवन बदलोआ'रदा ऐ। प्रधानमंत्री नरेंद्र मोदी हुंदी अगुवाई च शुरू होए दे स्वच्छता अभियान नै झारखंड दे दूर-दरेडे गाएं थमां शैहरें तगर साफ-सफाई गी इक जन आंदोलन दा रूप दिता। राज्य दे 91 प्रतिशत थमां मते गाएं खुल्ली थाहे बाहर फिरने थमां मुक्त घोषित कीता जाई चुके दा ऐ। इत्थे हून ठोस ते गिल्ली रेंद खेंद दे प्रबंधन पर बशेष कम्म होआ'रदे न। स्वच्छता गी हर नागरिक दे सुभाहू ते संस्कार च शामिल करने दा आह्वान करदे होई प्रधानमंत्री होरें आखेआ जे स्वच्छता छडा इक कार्यक्रम नेई ऐ- एहू स्थाडे जीवन दा हिस्सा होनी चाइदी। रांची च ग्रामीण महिलां जिनेंगी स्वच्छ भारत मिशन थमां सिद्धा-सिद्धा फायदा होआ, अज्ज बडयां खुश न। स्वच्छता ही सेवा मुहिम नै लोकें दी सेहत बेहतर कीती ऐ ते उंदा जीवन दा म्यार बधेया ऐ।

<><><><><><>

Army Chief –Russia

सेना प्रमुख जनरल धीरज सेठ होरें रुस दी त्रंऊ दिनें दी अधिकारिक जात्तरा दे दरान रुसी थल सेना मुख्यालय दा दौरा कीता। इस दरान दौनें मुल्लखें बश्कार फौजी सैहयोग गी होर मज़बूत करने, सिखलाई गतिविधियें दा विस्तार करने ते सेनाएं दे समर्थ विकास गी बढ़ावा देने च चर्चा होई। रुस पुज्जने पर जनरल सेठ होरें'गी औपचारिक गार्ड ऑफ ऑनर दिता गेआ। एहदे परैन्त उ'नें मास्को च सैनिकें दी समाधि पर श्रद्धांजलि अर्पित कीती। रक्षा मंत्रालय नै दस्सेआ जे अज्ज सेना प्रमुख, मास्को च स्थित राश्ट्री रक्षा नियंत्रण केन्द्र दा दौरा करडन ते रुसी रक्षा मंत्रालय दे वरिष्ठ अधिकारिएं कन्नै मलाटी करडन। रुस दे रक्षा उप-मंत्री वासिली ओस्माकोव इनें बैठकें च मजूदा फौजी घटनाक्रम ते रक्षा सहयोग बधाने दे उपाएं पर बचार सांझे करडन।

<><><><><><>

GoC WKC Udh.

फौज दी White Knight नाइअ कोर दे जीओसी लेफ्टिनेंट जनरल पी.के मिश्रा होरें डेल्टा फोर्स दे जीओसी हुं'दे कन्नै मजालता उधमपुर दे बैतल इलाके दा दौरा लाइयै उत्थे जारी आतंकवाद रोधी अभियानें दी समीक्षा कीती ते जमीनी सतह पर बने दे हालात दा आंकलन बी कीता। कोर कमांडर होरें बदलदे सुरक्षा म्हौल, संचालन सरबन्धी कार्य प्रणाली ते परिचालन कारवाइएं दी रफ्तार लगातार बनाई रक्खने सरबन्धी उपाएं दी समीक्षा कीती। इलाके च द'ऊं आतंकवादिएं दे सफाये लेई बलें दी सराहना करदे होई कोर कमांडर होरें लक्षित कार्रवाई, उच्चे मनोबल ते मजबूत बचनबद्धता दे प्रदर्शन लेई व्हाइट नाइट कोर दे जवानें दी सिफ्त कीती।

<><><><><><>

EAM-Bhutan

विदेश मंत्री डाक्टर एस. जयशंकर होरें भूटान दे विकास सरबन्धी लक्ष्यें ते प्राथमिकताएं लेई भारत दे सहयोग दी पुष्टि कीती ऐ। भूटान जात्तरा दरान डाक्टर जयशंकर होरें भूटान दे विदेश मंत्री, लिन्पो डी.एल धुंग्यल हुं'दे नै दपक्खया सहयोग दे सबनें आयामें ते आपसी महत्वै आहले क्षेत्री ते अंतरराश्ट्री मुद्दें दी समीक्षा कीती। दौनें पक्खें, भारत-भूटान सांझ भ्याली गी तगड़ा करने च होई दी पेशरफ्त दी सराहना कीती। श्री जयशंकर ते धुंग्यल होरें केइएं विकास परियोजनाएं दा शुभारम्भ कीता। इंदे च मोंगार च 65एं बिस्तरें आह्ला, ग्याल्सुएन जेत्सुन पेमान जच्चा बच्चा अस्पताल, समद्रुप-जोंगखर-त्राशिगां राश्ट्री जरनैली शिड़कै पर जगन्नाथ पुल ते भूटान दे बुमथांग च राश्ट्री पशु प्रजनन केंद्र गी भारत आसेआ 43 जर्सी गवां दित्ता जाना बी शामिल ऐ। भारत नै भूटान सरकार गी 54 इलेक्ट्रानिक वाहन बी सौंपे। दौनें मंत्रिएं 500 किलोवाट दी लुनाना पनबिजली परियोजना दा नींह पत्थर बी रक्खेआ। बैठक च दौनें पक्खें मार्च 2024 च होठ दी उर्जा सांझेदारी पर सांझे नजरियें दी अमलावरी पर संदोख बुज्जेआ। दौनें देशें उर्जा सहयोग च हाल दी पेशरफ्त दा बी जिक्र कीता। एहदे च भूटान दिए पन बिजली परियोजनाएं च भारती कंपनिएं दी सरगर्म हिस्सेदारी दा बी सोआगत कीता गेआ ते आखेआ जे एहदे नै दौनें देशें दे मौजूदा उर्जा सहयोग गी गति थ्होई ऐ। डा. जयशंकर ते श्री धुंग्यल होरें यू.पी.आई आधारित सुविधा दे शुरू होने दा सोआगत कीता। एहदे नै भूटान दे नागरिक भूटान दे मोबाइल एप्लीकेशन राहें भारत च डिजिटल भुगतान करी सकंगन।

<><><><><><>

Defence Mr. HAL

रक्षा मंत्री राजनाथ सिंह अज्ज कर्नाटक दी राजधानी बेंगलुरु च इक समारोह च हिंदुस्तान एयरोनाटिक्स लिमिटेड एच.ए.एल दे ज्हाजें ते हेलीकाप्टरें ते पपन हंस गी सौंपे जाने दे कार्जकम च शामिल होए। इस दरान दो हौले लड़ाकू एफ.ओ.सी ट्रेनर विमान ते पैहला हिंदोस्तान टर्बो ट्रेनर-एच.टी.टी 40 बोसिक ट्रेनर ज्हाज, ब्हाई सेना गी ते 4 ध्रुव नेक्स्ट जेनरेशन हेलीकाप्टर पवन हंस सौंपे गो। एचटीटी 40 ज्हाज आधुनिक काकपिट कन्नै लैस न। ध्रुव नेक्स्ट जेनरेशन हेलीकाप्टर भारत दा पैहला स्वदेशी नागरिक हेलीकाप्टर ऐ जेड़ा डोआरी भरने दे सुरक्षा मानकें ए.एस-4 पर पूरा उतरदा ऐ।

<><><><><><>

Microsoft CEO-AI

माइक्रोसाफ्ट दे सीईओ सत्या नंदेला होरें आखेआ जे आर्टिफिशल इंटेलीजेंस गी भारत दे करसानें, लौहके कारोबारियें ते ग्रामीण समुदायें तगर पजाना लोडचदा, नां के छड़ा तकनीकी कंपनियें तगर। सीटल च आयोजित आइडिया 4 इंडिया फोरम च 40 शा मते भारती अमरीकी तकनीकी बपारियें गी संबोधित करदे होई नंदेला होरें उद्योग जगत थमां लेइयै लोके तगर पुज्ज, डेटा सम्प्रभुता ते मनुक्खी निगरानी पर ध्यान केंद्रित करने लेई आखेआ। उनें इक ऐसे उपकरण दी मिसाल दित्ती जेड़ा ग्रामीण करसानें गी उंदी मकामी भाशाएं च सरकारी सब्सिडी हासल करने च मदद करदा ऐ। अमरीका च भारत दे राजदूत विनय कवात्रा होरें बी इस आह्वान दा समर्थन करदे होई जोर दित्ता जे ए.आई दी सफलता दा पैमाना समाज गी होने आले इस फायदे कन्नै कीता जाहगा।

<><><><><><>

Rly. Nero Project

भारती रेलवे नै दक्खन मध्य रेलवे दे मुकुटचंदूर बश्कार तकरीबन 38 किलोमीटर लम्मी नमीं रेल लाइन दे निर्माण लेई 493 करोड़ रुपें दी परियोजना गी मंजूरी देई दित्ती ऐ। रेल मंत्रालय नै दस्सेआ जे नमीं रेल लाइन इक लौहका ते बेहतर रेल रस्ता हासल करोआग। एह्दे कन्नै जात्तरा दा पैंडा जात्तरा च लगगने आहले समें ते सरबन्धत लागत च कमी औग। एह् रेल लाइन मौजूदा वर्धा मानिकगढ़ रेल रस्ते पर भीड़ घट्ट करने लेई इक दुआ रसता बी हासल कोआग।

<><><><><><>

Moodies

आलमी सतह पर दर्जेबंदी सरबन्धी एजेंसी मूडीज ने चालू माली बरें लेई भारत दे असल जीडीपी विकास दर दे अंदाजने गी 6 फीसद शा बढ़ाइयै 7 फीसद करी दित्ता ऐ। एजेंसी ने आखेआ ऐ जे एह् संशोधन पच्छिम एशिया च संघर्ष करी पैदा यक्को-तक्की दे दरमयान भारती अर्थ बवस्था दी मजबूती गी दर्शादा ऐ। एजेंसी नै मेद बुज्झी ऐ जे भारत सबनें जी-20 अर्थ बवस्थाएं दे मुकाबले च तेज रफ्तार कन्नै अग्रे बध्ना बरोबर जारी रक्खोग। दर्जेबंदी आली एजेंसी मूडीज नै आखेआ जे 2026 दी पैहल तिमाही च सलाना बिनाह पर भारत दी असल जीडीपी विकास दर 8 अशारिया 2 फीसद रेही जिसले के 2025 च एह् 7 इशारिया 3 फीसद ही। एह् मजबूती निजी रास-पूंजी च तेजी सने सेवा खेत्तर दी मजबूती करी मुमकन होई ऐ।

<><><><><><>

Teqball

भारती टेकबाल च पैहला-पैहला मैच खेड्डे आहली क्विम्सी जोआकिम डिसूजा होरें अज्ज बड्डलै जपान दे आइची नागोया एशिया खेड्डें च महिला एकल स्पर्धा च दो जित्त हासल करियै सेमीफाइनल च थाहर पक्की कीती ऐ। क्विम्सी होरें ग्रुप-ए, मैच दो च शानदार वापसी करदे होई जपान दी यूइना सकामोतो गी 2-1 कन्नै हराई दित्ता। एह्दे मगरा उनें ग्रुप ए मैच 3 च कम्बोडिया दी Koemyean Dy गी 2-0 कन्नै हराया।

<><><><><><>

IMD-Weather

मौसम विभाग नै अज्ज बिहार, ओडिशा, बंगाल, उप-हिमालयी, पच्छिम बंगाल, सिक्किम, केरलम ते राजस्थान च मौलाधार बरखा बरने दी संभावना जताई ऐ। तोंआई उत्तराखंड, आंध्र प्रदेश, छत्तीसगढ़, गुजरात, मध्य प्रदेश, कोंकण, गोवा, कर्नाटक ते लक्ष्यद्वीप च तेज हवा चलने दा अनुमान ऐ। अगले दिनें दौरा 2न तमिलनाडू, केरलम, माहे, पूर्वोत्तर दे किश हिस्सें च ते अंडमान निकोबार द्वीप समूह च बी इसै चाली दा मौसम रौहने दी संभावना ऐ। राश्ट्री राजधानी दिल्ली च अज्ज हलके बदल छाए दे रौहने दी मेद ऐ।

<><><><><><>

EC-TC Symbol

निर्वाचन आयोग नै पश्चिम बंगाल च होने आहले विधान सभा उप-चुनाएं गी दिक्खदे होई All India Trinamool कांग्रेस दे नांस ते ओदे आरक्षित चुनां चिन्ह दे इस्तेमाल पर अंतरिम रोक लाई दित्ती ऐ। आयोग नै पार्टी दे दौने प्रतिद्वंद्वी गुटें गी उप-चुना च इन्दा इस्तेमाल नैई करने दा निर्देश दित्ता ऐ। आयोग नै ममता बैनर्जी ते अरुण राय दी अगुआई आहले दौने गुटें गी अज्ज बड्डलै 11 बजे तगर अपने-अपने समूह आस्तै त्रै नांस ते त्रै मुक्त चुनांस चिन्ह तरजीह दे क्रम च देने लेई आखेआ ऐ।

<><><><><><>